

CONVOCATORIA DE CONCURSO DE MÉRITOS PARA A SELECCIÓN DE CANDIDATURA Á DIRECCIÓN DO MUSEO DO POBO GALEGO

O Consello de Goberno do Padroado do Museo do Pobo Galego, na súa reunión de 10 de xaneiro de 2019, acordou convocar concurso de méritos, de acordo co procedemento e calendario que se detallan a continuación, para a selección da candidatura á dirección do Museo do Pobo Galego que se propoñerá á Asemblea do Padroado, segundo establecen os Estatutos.

BASES DA CONVOCATORIA

1ª. As persoas solicitantes deberán ter unha titulación universitaria superior na área de Humanidades.

2ª. As solicitudes, acompañadas da documentación requirida, remitiranse vía correo electrónico (secretaria@museodopobo.gal), por correo certificado (Museo do Pobo Galego, San Domingos de Bonaval, s/n – 15703 Santiago de Compostela), ou ben mediante entrega presencial no rexistro do Museo. O prazo de recepción remata o **20 de febreiro de 2019**.

3ª. As persoas solicitantes deberán presentar a seguinte documentación:

a) Solicitud co compromiso de que, en caso de resultar seleccionada a súa candidatura, estará en condicións laborais e residenciais de cumprir as súas funcións a tempo completo no Museo.

b) *Curriculum vitae* con todos os datos persoais e académicos e todos os méritos que se estime oportuno alegar, sempre que estean debidamente documentados.

c) Proxecto para a dirección do Museo, no que a persoa solicitante expoñerá as súas ideas sobre a propia dirección, as relacións desta co persoal e co Padroado, e o presente e o futuro do Museo. Os/as candidatos/as poderán pedir previamente á secretaria do Consello de Goberno (secretaria@museodopobo.gal) ou á coordinadora dos departamentos (direccion@museodopobo.gal) información sobre o funcionamento e organización do Museo.

4ª. Serán méritos preferentes: a experiencia profesional ou investigadora no ámbito da etnografía e da antropoloxía, nomeadamente nas galegas; a colaboración previa co Museo do Pobo Galego; e a experiencia de xestión en museos ou entidades afíns.

5ª. A Comisión de Selección estará presidida polo presidente do Padroado e formada polos membros da Comisión Permanente do Consello de Goberno máis un representante de socios e socias neste Consello. Se algún solicitante fose parente até terceiro grao dun membro da Comisión de Selección, este deberá renunciar e o Presidente procederá a substituílo por un membro do Padroado non incurso en incompatibilidade.

6ª. Pechado o prazo de admisión, a Comisión de Selección comunicará a todos os/as solicitantes a relación de admitidos e excluídos, indicando neste último caso os motivos da exclusión.

7ª. Logo de considerada a documentación das solicitudes admitidas, a Comisión de Selección programará entrevistas presenciais cos/as candidatos/as mellor avaliadas para comentar as cuestións que considere pertinentes sobre o curriculum e o proxecto. A inasistencia inxustificada a esa entrevista implicará a renuncia a participar no concurso. Se fose por causa de forza maior, a Comisión de Selección poderá conceder unha segunda cita pero sempre dentro do calendario establecido.

8ª. Feitas as entrevistas, a Comisión de Selección elixirá por maioría, a ser posible dentro da primeira quincena de marzo, unha das candidaturas, que propoñerá ao Consello de Goberno mediante escrito acompañado da acta de todo o proceso. Tamén poderá seleccionar unha candidatura suplente, ou varias con orde de prelación, por se fallase a principal polas causas que fosen.

9ª. O Consello de Goberno propoñerá a candidatura seleccionada á Asemblea Xeral do Padroado do Museo do Pobo Galego, a ser posible dentro da segunda quincena de marzo de 2019, para a súa aprobación e, se procede, o nomeamento e a contratación do director ou directora do Museo. O resultado final do proceso será publicado na páxina web do Museo.

10ª. O contrato será laboral indefinido a tempo completo, cun período de proba de seis meses, durante os cales o Consello de Goberno poderá rescindilo discrecionalmente. O salario será de 30.800 (trinta mil oitocentos) euros brutos anuais repartidos en catorce pagas. En todo o demais rexerá polo Convenio de Oficinas e Despachos ao que está acollido todo o persoal do Museo. As funcións da dirección serán as que están establecidas nos Estatutos e no Regulamento de Réxime Interno en vigor.

Santiago de Compostela, 14 de xaneiro de 2019

Francisco J. Sanjiao Otero,
secretario do Consello de Goberno do MPG